

知廣靈縣事新淦李煥斗谷愚輯編

儒學

教諭河津任之琇瑩石

較閱

訓導長平劉介祉衍百

邑人王五鼎金鉉纂修

王逢泰遇巷

李長榮吐秀

學生

白屋隆乃升

同訂

王振斯蝨羽

政令誌已

叙曰聞之有治人即有治法則興利革弊遏惡揚善政令尚焉大史公曰法令所以導民也刑罰所以禁奸也若政令不修而徒以刑罰繩其後可乎哉惟在明禮義講律令勤宣聖諭以開暗愚氓斯庶幾焉古云皇極建則治道隆教化行則風俗美此之謂矣志政令

鄉約

國朝順治九年頒教民六諭

鄉約圖

孝順父母

尊敬長上

和睦鄉里

聖諭

教訓子孫

各安生理

毋作非為

康熙九年頒合律鄉約全書

敦孝弟以重人倫

篤宗族以昭雍睦

鐘

軍民人等
約正
約講
歌童

鐸

香

縣官
教諭
訓導
佐領
史員
案

案

鄉官
貢士
監長
義塾

生員
耆老

鼓

副約
講童
歌童
軍民人等

和鄉黨以息爭訟

重農桑以足衣食

尚節儉以惜財用

隆學校以端士習

上諭

黜異端以崇正學

講法律以儆愚頑

明禮讓以厚風俗

務本業以定民志

訓子弟以禁非爲

息誣告以全良善

誠窩逃以免株連

完錢糧以省催科

聯保甲以弭盜賊

解讐忿以重身命

論曰講鄉約卽講學也何言之講學不過與臣

言忠與子言孝與兄弟言愛敬與族黨言親睦

卽物窮理隨事盡道致知力行求不欠其

而已矣方今

聖人發政首重是典仍頒全書於郡縣良長吏仰體

德意每於月朔會官屬紳士老幼人等親行演說

命師儒分鄉宣諭總要提醒其良心不使昏昧

更於何處再討聖賢道理故曰講鄉約卽講學

也後著

大清律做古月吉讀法不率教者邦有常刑惟在實

實遵行已見官師約長共相勸勉猶厚望於闔

邑老幼人等云

碑禁

巡按山西等處兼管屯田監察御史加一級
白爲永除晉民八害事 一除收糧加耗之害
凡州縣徵收錢糧不許明加暗扣需索火耗
一除簽派里民解銀之害 凡一應錢糧奉
旨吏收官解不許私派小民幫貼使費 一除報民
喂馬之害 驛馬奉

旨官喂官養不許私派里民幫貼草料工食不許尅

短

一除濫派雜差之害

正額之外不許指

稱別項名色科派里民

一除勒取借領之害

在庫錢糧不許借公侵尅勒取里民甘結賠

補 一除包攬錢糧之害

一應錢糧令民自

封投櫃不許衙役里長包攬花費致小民賠補

一除索取行戶之害

不許買辦人役指稱

官府賒取行戶貨物虧短價值

一除衙役擾

民之害道府廳等官不許濫差衙役下鄉攪擾

鄉民科索錢物

以上八條有犯官則飛章叅 奏役則立斃杖下
署篆府司楊公禁革碑記

公三韓人也隸籍旗下諱加禎字岐岡卓犖通
才任大同府經歷司經歷當道因公之器嚴玲
瓏才優盤錯申命代篆廣靈際 晉撫達老爺
激濁揚清固一路福星而太守 林老爺復公
慎廉明嚴禁屢示公蒞任之始目睹邑艱念深
疾苦凡一切有害於民者申請革除噫嘻昔時
豈無明示祇同掛壁之文今公實實遵行毫無
巧飾陽奉陰違之事是以誠能動物民邑惟
惟恐嗣後沒公之惠故悉書革欵爰鏤諸石以
垂不朽云

計開革欵于後

一革除火耗令民自封投櫃 一革除不許牽
報糧頭 一革除里民領解錢糧 一革除運
錢脚力自覓 一革除安設自置 一革除村
庄駝運柴炭 一革除不用行戶照市平買
一革除採取土產等項康熙九年歲次季春立

詳文

邑令李煥斗

爲電鑒災黎極苦詳豁絕戶錢糧以安民生事

據士民

白耀禾王鳳翥

等稟稱切緣廣靈地處極邊兼

屬山隅地薄人稀不意歲前旱疫並災人民多

斃以致戶虛地荒目今僅存殘喘本身差糧不

能依期完納安能包賠絕戶錢糧若不泣陳詳

豁恐招徠者復逃而久住者亦不能安業矣祈

天詳豁民生得安爲此上稟等情到縣據此該

卑職看得廣靈疲瘡山縣人戶稀少土產無出

豐稔之年半屬嗷餓正供懸欠官斯土者補

無術困累接踵况值連歲洊荒餓殍委於溝壑

疫症流傳版圖半屬鬼錄而逃亡趨食所在見

告以致戶口虧缺因而滿目蒿萊現在餘生僅

存肌骨實難代耕無主荒土豈能代納無主丁

糧屢蒙 憲檄着令招徠總爲丁糧所累恐土

著者不能安其耕耘而逃亡者難以復還鄉井

去歲若非 上臺仁慈請額

皇恩獨賑茲邑幾成廢壤查定例內地地方有荒糧絕

丁累民賠納者聽有司查實詳轉 督撫應開
豁者奏

請開豁遵行在案值此奇災之後丁缺土荒 國
課懸拖與其受叅罰於賦逋無出之日何如訴
情形於起死回生之秋查今番編審共缺死逃
人丁七百九十三丁各則不等共缺銀六百九
十六兩八錢八分又續荒無主各色地畝共九
百七十八項該糧銀一千二百四十四兩六錢

零卑職已曾履畝查勘明白實因人戶空虛以
致荒土遍野今據士民

白耀彩等紛紛哀訴前
王鳳翥

來職若不據實請籲是置民瘼於罔聞悞封疆
於俄頃豈職司守土者所忍出乎合無將丁
荒地糧銀具文詳懇 憲恩轉請具

題豁免以救目前不遺俟卑職竭力招徠勸墾陸
續申報復額則正賦亦不至終懸一轉移間而
有造於地方匪淺鮮矣

為編審缺額事照得廣靈土瘠民貧人戶稀少
視雲鎮為第一殘縣已非一日卑職蒞任二載

多方張示苦心招徠借給牛種休養安息無論
遠年逃民漸次復業還家者甚多惟是連年饑
荒餓死者十之二三兼之時症大作病死者十
之四五以致丁倒戶絕缺額甚多卑職向已具
文申詳在案茲者奉文五年編審職遵舊例查
編十一月十七日齋戒誓神矢公矢慎順里順
甲逐戶嚴查推敲不遺餘力原額通縣共人丁
若干各則不等共徵銀若干今查出老病死故
人丁若干實在現存人丁各則不等共丁若干
新增幼丁各則不等共丁若干除將新丁頂補
死亡外實在現存若干各則不等徵銀若干仍
該缺額丁七百九十三丁各則不等共缺銀六
百九十六兩八錢擬合造冊隨文申報獨是編
審大典屢奉 憲臺申飭惟求加增以佐軍需
職司守土方欲勉爲加增仰副 憲令少稱厥
職何期缺額如許之多無奈邊陲瘠壤凶疫洊
罹閭巷蕭條村烟慘淡是以察審之下逃亡趨
食者固有餓斃病絕者獨多是能爲者人而不

能爲者天也今欲將缺額人丁責之現在包賠
恐鳩形鵠面之餘生萬難納點鬼無人之虛徭
且邊方丁差門則頗重每丁動至一兩以上本
身丁役已自難支再欲令其包逃賠絕是一軀
而剝百孔之瘡一羊而剝數層之皮必無完膚
之理現今廣邑有一人而包納數兩者有一戶
而包納數十兩者卑職目擊情形無不寒心此
時而不據實大聲疾呼懇請 憲恩速爲拯救
將來戶絕累甲甲絕累里縣事立不可問矣
係精者錄事理會無據實呈請 憲恩速爲

殘邑轉報咨

題開審別國計民生均有攸賴矣

觀風示

爲借闕人文事照得廣靈延陵古邑典唐舊邦
星分昴畢之宮地居雲中之勝壺水豐泉文瀾
映桑乾之彩玉峯飛鳳靈秘分太白之奇雖僻
處岡巒之內實篤產王國之植人文世傑甲第
曾光於勝國忠節間生宗風不愧於名流麗侍

郎之芳規未逸古吏部之姓氏猶存聶王繼轍
齊李爭輝親往知今聞風斯起本縣以西江薄
質承乏上區讀學道愛人之訓雅佩中心當稽
古入官之秋敢虛夙志祇緣軍興孔急戴星未
皇於染翰以致仰止久虛觀瀾莫遂於測海茲
值三秋氣清天朗宜傾八斗擊案驚奇謹卜本
月某日敬酌茅水仰迓蒲車籬菊傲霜相應授
簡芙蓉浥露且自研硃賦滕閣驚人之句好趁
秋風駕龍山落帽之篇願乘春浪舍英壯華精
願朱轡我馬驛出風入雅聖瑞馬先見光華
晴便挾風雲敢異僧繚之上技顧目旋空冀野
還希伯樂之青眸怒如調饑願嘗九鼎一臠奮
其健翮應知萬里須臾敢布短言恭攀長駕幸
勿遐棄用慰延佇特示

禁輕生示

爲開曉愚民毋輕生命事照得廣邑地居邊界
風氣悍勁無論男婦多賦性決躁每以織芥反
唇乾餽細故動則輕生或繫項自縊或服毒捐

軀本縣蒞任未及一載種種見告聞之酸鼻言之傷心不思自縊人命若無威逼之實律無治罪之條爾等無知愚民輒謂一死可以洩忿於人孰知徒自送其性命無益於事或拋撇父母或丟下幼子或割結髮之妻蛾眉反向他人畫或捨青年之脣環佩空歸月下魂死者入於窅冥不可復生生者依然團聚誰惜其死况聞佛家之言懸梁投水而殞命者陰府不收不脫輪廻不享祭祀是生不得爲長年之人死作無所依歸之鬼豈不可憐豈不自悞爲此示諭各里各村人等知悉凡有識字者可將本縣此言說知愚夫愚婦務宜父誡其子兄誡其弟夫誡其妻明明白白互相曉諭古云救人一命勝造七級浮屠使愚夫愚婦曉然知捨命賴人空送性命無益於事則自然不爲輕生之行如有冤情何不鳴之官府以法責治洩此忿恨豈不美乎自示之後大家猛省代爲開曉保此天年安耕樂業毋蹈前轍自貽伊戚未便須知告示者

禁越訟示

邑令李煥斗

爲再飭健訟以保身家以安良善事竊照廣邑
土瘠民貧風俗淳古守法循理者固多間有一
種不安本分之徒喜於走空逞訟毋論事大事
小反眼卽興告訐立心專務詐罔傷財害民莫
此爲甚自本縣下車以來再三申飭嚴禁此風
稍稍寢息今歲微有收登又蒙

皇恩免糧門無石壕之吏家有蟋蟀之風正爾民保

養元氣寧家歡聚時也而刁訟者間又漸作祗
因本縣聽訟清明正直毫無過情知民無所售

其欺詐且讞獄止於逐責隨到隨結從不罰治
一文留滯一夕頑民不能快其夙忿謂此輕易
便宜之訟無能遂其一網打盡之心則不可得
志於本縣者或可得志於他屬也輒慕越上
控他處告擾及雖具告到縣不候審結復又越
次別控此等伎倆實爲平民大害而豈
盛世所宜有不思往返牽率道塗奔走衙門差提
使費所損實多止圖耗人之財而不知併耗已

財止圖傾人之家而不知併傾己家蓋訟憑理
斷豈容偏黨及至水落石出真情立見遭刑受
譴而外所以被費資財覆敗身家者已噬臍無
反矣即使萬一僥倖取勝本縣亦必研究根由
覆申公道豈容頑讒狂逞害我良民當此連歲
洊饑之後一文一粟何等艱貴爾民不思保重
自愛悞聽訟師簧惑貪圖非分之倖獲舉有限
之金錢而委之逝波則弄巧成拙誠愚之又愚

者本縣開爾半屬無知不能揆情度理輕聽旁
言自罹法網不得不有此一番告誡不獨為被

害之家慮兼為爾自身說法也爾卽頑石也該
點頭痴迷也該惺悟為此示諭八里士民人等
知悉嗣後務要小心守分得忍且忍得耐且耐
樂其妻奴保其和氣實自受無窮之福苟非萬
不得已不許輕動一詞如有真正冤抑具告本
縣只宜靜聽審理纖毫不得枉屈設或一審未
明不妨再求覆審務求真情剖白涇渭立分而
止本縣一片虛公熱腸不於此處用心讀書明

理之謂何斷不可悞聽訟棍貽他日不可追悔
之憂也如敢仍前逞詐踏空驀越別控定行依
律按治仍枷示一月以儆無良本縣矢心天日
士民共見法在必行勿謂言之不早也特示
禁賭示
邑令李煥斗
爲嚴禁賭博以保身家以安民生事照得賭博
之爲害宜淫誨盜傾家喪命皆起於此夫人而
知之矣是以

新例獨嚴此條凡犯賭博不分旗下民人旗下鞭一
百民人責四十板各枷號兩個月出錢放種之
人枷號三個月夫人至枷號兩月三月雖屬鐵
漢性命非其有矣而傷財傾家又何論焉興言
及此可無凜凜自懼哉廣邑雖貧而人心好賭
屢經 上司行文申飭季取無賭甘結本縣亦
不啻三令五申凡有發覺痛懲不少寬假而錮
習不除近日猖狂尤甚無論城關鄉村日夜聚
賭如某人某人本縣已一一訪查胸中腐心切
齒指不勝屈但未經首發不便憑空鑿究除目

今發覺如王讓善陳萬斗道保子史光榮等盡
法重處枷示外仍合出示嚴飭爲此示諭城關
八里士民人等知悉各宜自保身命力改前轍
勤力農畝多種幾畝地多收幾斗粟即可保養
一家生命而賭博一途視之如火之焚身如坑
之陷人遠避三舍以免此橫禍方爲良百姓上
不敗祖父之家下不貽妻子之辱如敢仍前聚
賭或被場中人告發或被旁人出首拿來審實
盡法重處依律枷示不恕自後着令各鄉約壘
長由頭不曉稽查一有此事即行出首如有
隱徇縱事發一體連坐但不許懷挾私讐捏造
假情妄告以多事於地方如虛反坐治罪不宥
慎之慎之特示

勸學示

邑令李煥斗

爲再行召募兒童習業以廣教化事照得廣邑
民風朴魯有餘彬彬雅不足除書香之家頗識文
字而外編氓子弟多不讀書不識鉛槧爲何物
總因家貧不能延師教習以致所在目不識丁

者甚多何以立身涉世本縣區區綿力不能廣
敷教訓然立意未嘗不諄諄惓切望爾民稍通
詩書之氣務臻淳雅之風已曾延請生員董榮
城中設立義學召集遠近幼童十數餘人負笈
習業雖不能遍行教道亦聊以示倡率也爾民
但稍可過活者各宜延師訓誨如實實力不能
者卽宜赴董生員門下習讀稍開胸中茅塞本
縣除給董生俸穀而外仍量給紙筆以示鼓舞
之意非教而望於民也爾民各宜勉力勿勿觀
此舉非教而望於民也爾民各宜勉力勿勿觀

節儉示

邑令李煥斗

爲禁飭奢侈珍重谷粟以保生聚事照得十八
九年之饑饉餓殍載塗流離滿目可爲寒心揆
厥所由皆因前此穀賤不甚值錢民間視此爲
尋常不甚要緊之物以故積儲者少空虛者多
一遇凶年束手待斃當此之時視升斗之粟勝
於明珠十斛良以得之則生弗得則死是向來
不甚要緊之物關於民之生死如此古人視谷

粟重於金玉錦繡蓋金玉錦繡僅可飾貌而不
可以克腹若積谷則父子可以保聚夫妻不至
流離一日積谷則保一家一日之生命一年積
穀則保一家一年之生命廣靈今歲可稱豐登
又值連年大剗之後誰不知穀粟爲生命所關
似無庸本縣諄諄告誡但恐有一種愚民見田
間多收數斛粟便以富戶自居無論男女喜於
鮮衣美食樂於豪華侈靡一切往來禮節甘心

賤賣穀粟崇尚繁文及至倉虛廩竭以思借貸
富戶以資贖者謂有九年之可備死不惜

邊方之士災祲不常本縣蒞任五載屢見阻饑
是以自春至秋日日有亢旱之憂時時有冰雹
之慮今歲厚邀天幸安能保于將來語云防
患於未然備荒於豐歲若到荒時而思補救亦
已晚矣是用切切慮之除窩娼賭博屢經嚴飭
犯出本縣自有大法處治外合行勸諭爲此示
諭士民人等知悉起此豐亨之年務宜切戒豪
奢珍重穀粟多有積趲卽稍遇凶年亦可保聚

一家骨肉不至流離失所古者三年之耕而有
一年之積九年之耕而有三年之蓄無非節省
留餘以防不測所謂有備則無患也爾民自辦
納正供而外切不可賤賣穀粟作爲無益之費
免致不測之時呼天不應求人不能卽欲保聚
一家骨肉豈可得哉望蠲望賑皆無益於事矣
本縣蒞任旣久痛瘼愈切覩徃思來不得不有
此一番告誡爲未雨綢繆之計迂腐中饒有苦

心匪敢以虛文塗飾耳目也各宜猛省無違後

勸民歌

邑令李煥斗

勸吾民 仔細詳 勤種地 早完糧

安故土 莫逃亡 愛兄弟 敬爹娘

守本分 勿竊攘 息爭訟 睦鄉邦

戒賭博 勿貪狼 思忍讓 勿逞強

教子弟 勿飄蕩 恤鰥寡 濟年荒

省浪費 保家方 聽余言 心勿忘

天福爾 降吉祥 官愛爾 免桁楊

若背斯言不省悟 難逃五刑與三章

大家黽勉相遵守 自然樂業永無疆

論曰政不一端便民者善令不一端正已者先
廣靈燕趙樓壤民俗慷慨而激烈喜賭健訟好
鬪輕生似難調治近荷邑侯李公 信賞必

罰除煩滌苛亦云次第就理矣仍與 各上憲

同心軫恤民隱繪圖屢請叨蒙

皇恩浩蕩蠲免十九年錢糧三分之一二十年地丁

全免兩次賑濟又將逃丁荒地銀一兩九釐
兩豁免三年不徵起丁而地銀一兩九釐

戶虛地荒元氣未實復額之後亦未易支催科
撫字之間正煩長吏之隱憂矣

選舉志

叙曰薦辟之典始於漢科目之制興於唐何一
非明試書升之遺哉有明三途並用而滄海無
遺珠矣我

朝因之甲乙兩闈嚴剔時弊以收真材明經廕監而
外兼施保舉視前代爲加詳以故名賢輩出樹
駿流鴻何其盛哉雖然前事者後事之師也苟
不表彰往哲何以勉勵來茲乎志選舉

甲科

明

聶友良 洪武進士

王尚文 正統丙辰進士

鄉舉

明

齊汝舟 永樂辛卯舉人

董魁 永樂甲午舉人

齊韶 正統戊午舉人

墨芸 宣德乙卯舉人

齊章 景泰癸酉舉人

劉瑩 弘治戊午舉人

貢選

明

趙祺 任監察御史

王惟一 任諭

王純 任昌平縣教諭

李文煥 任吳堡縣知縣

王莊 任遵化衛經歷 陞汝州同知

周簾 任開平衛經歷

李協中 任完縣主簿

王惟新 任四川道監察御史

曹友諒 任徽州府通判

李士廉 任青苑縣丞

王睿 未仕

劉宗 未仕

楊璉 任昌平縣知縣

王惟然 任涇州吏目

宋賢 任金縣知縣

馮演 未仕

李守正 隆慶年間拔貢 任魚臺縣主簿

李守宜 任洪洞縣教諭

李景

任高郵州判官陞西華縣知縣見列傳

李永年

未仕

白冕

任浙江台州寧海縣鐵場巡檢

白璽

冕之子任光祿寺署丞陞臨洮府通判

白汝清

璽之任任竹谿縣知縣

白汝淪

璽之長子任平鄉縣知縣

白汝澄

璽之次子任高唐州同知陞代府審理

白琬

汝澄之子任昨城縣教諭

白希曾

琬之長子任河南陽武縣主簿

白希閔

琬之次子任陝西鞏昌府西寧

王三接

儒之子任陝西

王儒

歲貢未仕

王五美

河津縣教諭

許敬中

仕

李挺

萬曆丙午副榜准貢

來賓

任山東冠縣主簿

董宗顯

任山東冠縣知縣

梁才

授七品冠帶

王璽

任引禮舍人

張友信

任秦州吏目

王倫

任滁州倉大使

楊憲

未仕

李成

未仕

王瑄

未仕

劉智

未仕

朱孔陽

未仕

趙文智

任鴻臚寺序班

董英

宗顯之子未仕

任志

任景州州判

鄧華

任山東壽光縣主簿

安泰 任固安縣丞

蘭瑞 未仕

趙文華 任河南永寧縣知縣

王士達 任處州府照磨

來士廉 任苑馬監正

董莒 宗顯之子任河南永寧縣丞

陞壽州判官

金鳴 任壽張縣主簿

王尚學 尚文之弟任處州府知事

田賦 任三水縣丞

張達 未仕

許俊 任雲南知事

田貢 任安定縣訓導

劉祺 任樂城縣主簿

王玘 任盧氏縣訓導

李九阜 任新鄉縣主簿

張鸞 未仕

董章 任眉縣知事

陳伯龍 未仕

金居義 任府同知

路雲 任訓導

齊維縉 任隴州訓導陞永年縣教諭

馬珊 未仕

任宗 任商水縣知縣

張維儒 任臨漳縣丞

董綸 任陝西行都司斷事

趙昌齡 任封丘縣丞陞柘城縣知縣

劉保久 任寧夏衛訓導

李瑞 任順義縣訓導陞安平縣教諭

仝鎮 未仕

王世美 任濟源縣丞

馬世祿 任南京北城兵馬司陞河間府

同知

曹志俸 任朝邑縣丞

郭朝 任黟縣主簿丁艱後改霑化縣

李守時 任高苑縣主簿

梁桂 任靈台縣主簿

王四隣 任大城縣主簿

趙鑾 未仕

焦經 未仕

路引夏 任文安縣主簿

董宜強 任長安縣主簿
陞周王府典簿

趙城 任安化縣知縣

譚繼龍 未仕

安奇齡 未仕

郭鉉 任景州訓導
陞永清縣教諭

鄧邦熙 任延慶衛訓導
陞崇信縣教諭

李春輝 任沂州訓導

齊慎 任澄城縣丞

樊天爵 任嘉興府經歷

趙廷義 任諸城縣主簿

范希文 任香河縣縣丞
陞深澤縣知縣

劉昆 任文安縣丞

董紳 任長葛縣丞

殷大輅 任文安縣丞

張萬祀 任文安縣丞

楊汝登 任醴陵縣主簿

李逢春 任獻縣縣丞

許攀桂 任孟縣訓導

董效 未仕

劉仕 任寶坻縣主簿

譚學義 任青州府經歷
署日照事丁憂

後補浙江紹興府

董聿修 任定州訓導

曹吉 任榮和縣訓導

王寬 任山東商河縣主簿

金登科

張斗南 任太原縣教諭

蘭廷弼 任山東青州府通判

李同芳

馬一龍

任應選 任太原府教授

任應瑞 應選之弟任大名府經歷 王成憲 授開封府杞縣通運所

張炳 王家祥 任大名府東明縣教諭

王所萃 任江南徐州府 梁紀 任北直隸涿州州同

聶嘉賓 友良七世孫任山東益都縣丞陞萊州府經歷

周朝憲 任順天府 周朝宣 任山東莒州吏目

任新民 任絳州訓導 梁嘉 任陝西漢中府經歷陞平涼府

平涼縣知縣 周應元 任山東歷城縣主簿

周應魁 任陝西甘肅州衛經歷 梁憲 任鴻臚寺序班

李通 任武清縣 張舉 未

田梅 任府經歷 梁喬擢 書

梁宇 授主簿 梁喬變 任四川鎮雄府經歷

國朝

白昞 以良之子汝清曾孫乙酉恩貢授永年縣知縣

譚愷 授通判 王五鼎 甲午拔貢任福建古田縣縣丞

三接任孫 魏國俊 考授訓導

曹重光 未仕 白昭 汝清曾孫任芮城縣訓導

梁士俊 任陝西興平縣教諭 梁士偉 授河南許州同未任

王開泰 任芮城縣訓導陞蒲州學正告致 卷之七

王五教 三接之孫任榆社縣訓導

梁士奇 任湖廣益陽縣縣丞

武 愼 任平定州學正

周之璟 考授訓導

李仙品 守正之孫副榜挺之子康熙九年貢元授潞城縣訓導休致

殷象瑚 考授訓導

梁毓奇 考授訓導

白耀采 考授訓導

王五位 三接之孫任趙城縣訓導

周之龍 考授訓導

楊 馨 未仕

周之琪 考授訓導

白文煥 昭之子考授訓導

全 達 考授訓導未仕

張于京 府學貢考授訓導未仕

明

監生

白以良 汝清孫太學生恩賜七品服色

周應泰 太學生

李延宗 景之次子授河南襄城縣主簿

齊克謨 任山東鄒縣主簿

李文美 任隆慶衛吏目

齊克寬 任桐鄉縣縣丞

王文勝 任海門縣主簿

曹 章 任霸州吏目

王 制 任霸州吏目

齊 寅 任寶坻縣主簿

齊 濂 任吏目

齊 魯 任韓府奉祀

蘭廷玉 未仕

以上官監

焦鈇 未仕

金升 任河間府照磨

王化 任狄道縣縣丞

李勳 景之孫授雲南楚雄衛知事後

陞直隸順德府經歷

劉鎮 任商州吏目

董進修 任永平衛知事

王棟 未仕

梁喬升 未仕

張世慧 任單縣丞

焦從堯 任岐山縣主簿

郭大鵬 未仕

溫大邦 未仕

李汝儉 任四川成都府照磨

任應祥 未仕

史尚官 任臨清州吏目

董道修 任萊蕪府經歷

曹紀 任臨潼縣主簿

白珩 汝清之子未仕

董師曾 未仕

曹綽 未仕

梁喬梧 任嘉興府照磨

溫登魁 任京衛經歷陞臨洮府通判

鄧鶴 任主簿

溫立極 任東城兵馬司指揮

董養正 未仕

王之藩 任濰縣主簿

仝尚忠 任臨洮府經歷

仝尚恕 未仕

董肇修

董用威

蔣嘉禾 任涇陽縣主簿

仝進 未仕

以上例監

周丕顯 太學生

張潛修 辛卯拔監

王應運 太學生監滿未授職

以上官監

張清修 由學生

韓光祖 由武生考授州吏目

韓一柳 由附學生

武桂 俊秀

韓峻德 俊秀考授州吏目

以上例監

武科

國朝

薛晉臣 未仕

王祈賓 未仕

王五德 孫未仕

李若蘭

將帥

金

康筠 任信武將軍開國男食邑三百戶

元

張顏 任元帥

張守中 顏之子任元帥武勇稱奇戰屢克敵今祀鄉賢

明

履雲鼎詩
聶興

累有武功陞
遵化指揮

李惟新

任保定
衛指揮

封贈

忠義承務郎光祿寺寺丞李景恤贈勅書祭文
制曰捐軀爲國固臣子之素心錫命報功乃朝廷

之彝典顧茲義例豈吝優恩爾河南開封府西

華縣知縣李景性本剛方才惟通敏早由胄監

職領華封比流賊之縱橫督民兵而拒守詎期

鋒鏑敢犯衣冠未收定亂之功亦遂求仁之志

節同許遠氣比臬鄉追念忠義實增哀悼匪加

褒寵曷勵臣工贈爾爲忠義承務郎光祿寺寺

丞錫之口勅命於戲生固有死惟得死之爲安

名不假人必因人而示勸揚崇階于渙號昭禮

數于泉臺祇服命詞永光來世正德八年四月

十七日 諭祭文

正德八年歲次癸卯八月丙申朔越六日辛丑

口口遣大同府知府鮑繼文致祭於西華縣知縣李

景贈忠義承務郎光祿寺寺丞曰惟爾擢秩西

華宰邑中州劇寇縱橫督民悍禦衆寡不敵竟
至捐軀忠義著聞朕心嘉尚超贈□京秩延賞
後人論祭載頒用慰冥冥靈其不昧庶克歆承
尚饗 李公祭品

猪一口 羊一隻 饅頭五分 鳳雞一隻

燂魚一尾 燂骨一塊 雞湯一分 案酒五

盤 降真香一柱 酒二瓶 酥餅各五個

果子五色五觔 大燭一對重一觔 小燭五

對 帛一端 虎一隻 米二升 香一束

棗二升 栗二升 酢二分 鹿酢五塊 鹿

脯五塊 焚紙一百張

光祿寺大官署署丞白塗封贈勅書

制曰國家推使臣之禮錄教子之功命秩旣厚其
躬褒封必及其父典章具在存沒攸同爾原任
浙江台州府寧海縣鐵場巡檢司巡檢白冕乃
光祿寺大官署署丞塗之父詩禮傳家勤勞效
職訓成嗣子榮列今官祿養已違賢能茂著宜
頒卹典以勵顯揚茲特贈爲徵仕郎光祿寺大

官署署丞渙號是承幽冥永慰

制曰母德之慈實兼乎教育國恩之錫特厚于褒
榮肆緣報本之心誕示追崇之命爾劉氏乃光
祿寺大官署署丞白塗之母相夫治內教子成
名養弗逮于生前名宜顯于後身爰頒渥典以
示卹恩茲特贈爲孺人服此寵光永昭冥漠

嘉靖元年五月十三日

光祿寺大官署署丞白塗封贈勅書

制曰光祿之官國家所重四署之屬政務實繁必
行能之俱優斯職業之能舉麗褒所及正佐攸
同爾光祿寺大官署署丞白塗業成胄監官列
朝行出納有方操持罔玷賢名允著慶典方行
宜有恩章以示褒勸茲特進爾階徵仕郎錫之
勅命於戲列于庶佐固繁簡之各殊慎乃攸司
必始終之無怠勉圖來效以迓新恩欽哉

制曰臣有事君之功妻有從夫之義故錄賢勞於
國必推寵命于家存沒雖殊恩典則一光祿寺
大官署署丞白塗妻陳氏出自高門嬪于良士

方資內助顧弗永年宜媿夫階以申卹命茲特
贈為孺人懿靈有知歆承無斃

制曰室當有繼式隆饋祀之儀恩貴乎均肆及褒
封之命式閑倫理備載典章光祿寺大官署署
丞白堊繼室劉氏夙遵姆訓繼配儒流雖未躬
井日之勞亦克效蘋蘩之職爰因夫貴用示
國恩茲特封為孺人欽服寵名益光閨闈

嘉靖元年五月十三日

馬齡世祿勅贈承務郎南京北城兵馬司

母趙氏贈安人妻董氏勅封安人

溫大邦登魁之父勅贈徵仕郎北京衛經歷

母呂氏封太孺人妻王氏勅封孺人

恩廕

明

李延齡景之長子承廕恩生聽

李熙任河南歸德府通判後

王翊調直隸高邑縣知縣

椽吏

明

李延祖

景之三子授陝西利益倉大使陞贊縣十八盤巡檢

李

然

景之孫詒給七品冠帶

國朝

張

搏

考授從九品

王問臣

考授雜職

仝丹宸

考授雜職

論曰鍾鼓歌於岐陽而王國之楨作教鐸施於東魯而文行之彥興人材固由作育而發憤自

強者士固不可已哉我廣邑前賢表表或以科名顯或以忠節著或以建白傳即明經廕監亦有卓然樹立者流風固未遠也

國朝嘉意作人羅網宏開一時海內士各自毅然表見當世而廣邑未有會風雲而近

日月者獨何歟子輿氏曰奮乎百世之上百世之下聞者莫不興起而况流風未遠可曰嗣徽無人哉

國法莫不興也... 曰國無一人

以清... 曰舊... 百世之

貝當... 會風雲而

國... 人... 一... 內士各自

亦... 樹立... 未

... 以... 數... 日... 則...

人物志

叙曰詩云民之秉彝好是懿德魯論云十室之

邑必有忠信由是言之則人物之不擇地而生

也明矣廣靈為雲中之屬邑地高天邇土聚水

深故所產之人率皆質直好義慷慨激昂是以

歷代忠烈懿軌表表在人耳目間後此雖顯晦

殊途升沉異遇然苟有德義可師鄉族推重者

借以匡俗而範世亦一方表樹之林也古人云

善無微而不錄此之謂乎志人物

列傳

後魏

古

弼

忠謹好讀書善騎射太武即位拜立節將軍以功封靈壽侯歷位侍中吏部尚

書雖事務紛雜而讀書不輟端謹慎密口不言禁中事嘗奏上谷苑囿過度宜減大半以

賜貧民魏主時與給事中劉樹奕志不聽事弼侍坐良久趨捧樹殿之曰朝廷不治定爾

之罪魏主改容釋恭曰不聽奏事朕之過也遂可其奏弼俯伏曰為臣無禮其罪大矣乃

免冠請罪太武優之今祀鄉賢

伊

馥

有絕力走及奔馬曳牛却行仕魏為侍郎太武之將討涼州也議者咸諫以為

無水草惟司徒崔浩勸行馥不知書直以意

至公卿特未讀書耳浩曰何必讀書衛青霍

去病亦不讀書而大建勳名致位公輔太武

笑曰誠如公言馥雖武健而性忠謹及至三

公清約自守政舉大綱今祀鄉賢

遼

高

起

任吏部尚書

魏

鑑

鄉貢進士

金

崔彥卿

任戶部尚書

張

道

鄉貢進士

元

龐清 任吏部侍郎

齊震 任宣德府同知

聶諒 任大寧府管今祀

聶仁 諒之子任常德府總管通判陞

高州知州

齊成 任商州知州

聶鐸 諒之孫任寶坻縣主簿

齊思賢 成之子任宗正府郎中

李士庸 任靈丘縣主簿

明

聶友良 諒之玄孫洪武進士任四川道監察御史

王尚文 正統丙辰進士任戶部江西司主事英宗北巡尚文以督餉從土木之難王振

債事數十萬師一鼓而盡尚文脫行數里復奔還求上上已報被陷難而北行尚文種哭隨

之臣勅賜鄉賢廕于翊入監

李景 博學不第後領歲薦授高郵州判官擢知西華縣事正德中流賊猖獗攻圍城

池景躬擐甲胄與民守之援絕城陷被執賊持刀脅之曰能從我無憂富貴景厲聲罵曰

我天子命官竭力討賊與城存亡今已矣尚向女求活耶奴輩速殺我罵不絕口遂被害

給事吳玉榮以事聞武宗嘉其節勅贈光祿寺寺丞命於鄉賢致祀焉廕子延齡為監生

忠

明

王尚文 詳見列傳

李景 詳見列傳

孝

袁表

祖老父吉家貧莫能供菽水杞載乃翁送山中歸將投杞於薪表年甚幼取而懸之吉詰曰懸此何用表泣對曰預為阿翁具吉聞之俛首悔悟乃引杞循故跡載祖父以還後杞跡所歷草皆偃生至今尚存人以為孝感所致云

董莒

庠生父宗顯任冠縣令卒哀毀骨立水漿不入口者數日既塋以父所遺鏹悉分諸兄弟其事繼母無異出已者後以貢授永年縣丞在任有政聲擢壽州判官見府志

趙昌齡

庠生父早逝迨母卒廬墓三年後應貢縣事精明果斷吏畏民懷至解組歸行囊如洗柘人至今思之

國朝

韓一

蘇俱庠生邦和子也順治元年間闖賊餘

受拷血肉淋漓一歐立斃一蘇亦幾死賊憐其孝而釋其父及賊退一蘇復甦聞其父存而喜曰吾父存吾雖垂斃厚幸但痛吾弟之死為過慘爾遂調養備至使父得享年而終一時鄉人咸稱韓氏兄弟一死一生皆純孝云知縣李公扁旌其廬

節

明

梁氏

劉大海妻年二十八歲夫亡遺子撫育成立其在發室非拜祭先壘不出戶庭持節始終人無間言嘉靖中

趙氏

太學生譚繼龍妻也夫亡氏年二十四歲子香尚在襁褓氏撫育周密嘗言譚氏宗

祀止此子耳倘失愛護妾何足惜如譚氏宗祀何萬曆十一年知縣劉公審問扁旌其門
王氏董繼妻繼卒氏年二十九歲持志孀居撫遺孤子自修成立為安定驛丞萬曆十一年知縣劉公審問扁旌其門

郭氏任朝陽妻陽故氏年二十歲腹有孕每夕焚香祝曰願天賜一男妾夫為不亡矣後果生男郭氏撫之周密值姑縱次子逼嫁利其產郭氏執節毀容以死自誓姑知事不諧凌辱萬狀郭茹氣受之無怨言後子鼎年七十氏方卒

國朝

譚氏任匪小妻夫亡氏年十九公姑以無出欲嫁之氏曰身有遺腹男女皆夫之嗣也願為未亡人數月產男品秀斷髮毀容以保孤自誓品秀甫遊泮不幸天亡遺孫若尹零丁孤苦方離乳哺氏撫育成立一如教子至順治八年亡壽七十一歲知縣孔公際魁扁旌

其門
李氏王前陳妻年二十歲夫故生子紹祖未彌月晝夜號哭幾不欲生翁姑諭曰吾家兩世止有此孤汝能寡守保護王氏之宗不絕何以死為氏仰天誓曰敢有二心者鬼神誅之於是茹苦食貧上事公姑下撫幼子今紹祖列贊官食廩餼三十五年內外無間邑侯李公煥斗扁旌其門

周氏生員梁士彥妻夫死遺氏年二十九歲幼子梁承芳方在襁褓翁姑詢曰汝年少家貧子幼難以苦守不如早自為計氏曰夫雖死子尚存妾忍舍翁姑幼子而作他想乎荼苦自甘撫訓幼子後承芳十九歲入泮始終如一人無間言竟以壽終邑侯李公煥斗扁旌其門

旌其門

宋氏

梁士達妻夫死氏年二十五歲幼子雲芳年未週伯叔父母欲強嫁之氏誓曰妾若

嫁人有何面目見夫于地下乎立志守貧刻苦撫育其子雲芳今年已五十孫允中將及

三旬氏仍康健不衰邑侯李公煥斗扁旌其門

宋氏

首貢生員梁六德妻夫死遺氏年二十一歲子士顯五歲士美三歲翁姑泣曰吾兒

早死遺二幼子備誰撫乎氏泣曰夫死有子妾撫之則可報夫于九泉矣自甘荼苦孝養

翁姑訓育幼子後二子俱入邑庠長孫羸芳亦列武生享年七十五歲死之日鄉里備之

邑侯李公煥斗扁旌其門

義

明

蘭朝海

溫雅尚義輕財好施嘗曉行途中拾白銀一囊守候良久莫有求者乃書楮揭

門城巷口越數日亡金者來索朝海詰曰汝金幾何錠幾何客以實對朝海發囊閱之果

如所言慨然與之客欲分半為謝朝海不受客再拜曰他日當啣結報翁矣遂攜而去

國朝

周于德

詳見凶逆

周于道

詳見凶逆

李

莫

詳見凶逆

論曰造物發祥篤生靈異英豪自命遜志媵修

况表章賢軌卽以振勵來茲曩史已載者固不

可畧卽曩史未列者亦何可不錄歟廣靈自元

魏以迄有明文武勲庸忠義孝友固已炳天壤
燦編摩矣至韋布閭閻凡有一節之美爲廣靈
產者俱山河之秀而閭里之光也可令其泯沒
而無聞歟故旣舉其槩復別其類以備史氏採
焉後之人觀感而興起者端在乎茲矣

凶逆

順治五年總兵姜瓖叛據大同六年二月渾源
逆黨朱廷佐糾集千餘人剽掠庄堡邑崇李青
許登旺等勾連賊衆攻圍縣城知縣范公發懸
以大義勸諭士民晝夜捍禦與城存亡仍調四
鄉義民救援有北鄉庠生周之屏率長子生員
周于德次子周于道暨妻侄生員李冀統鄉民
挺身赴援被賊邀擊于後衆寡不敵于德于道
李冀三人被執俱不屈而死范公潛縋壯士赴
英王麾下請兵勦滅之賊遂平將李青等棄市籍
沒其家

李俊貧而不孝母癩且老驅令牧牛母被狼噬
委棄不葬於二十二年六月內父子同牧牛山

廣靈縣志
頭李俊聞雷心怖避石洞中山下耘者見洞口
雲氣瀰漫火光閃爍霹靂數聲有龍攫李俊至
雲中猶呼子不絕口盤旋有頃仍擲李屍於
母噬處骨肉如泥矣見者駭焉

論曰志人物而附凶逆者何蓋以昭美惡示勸
懲也夫人豈有生而凶逆者哉由平時縱恣不
檢陷溺其良心甘爲匪類習與性成耳如朱廷
佐李青之從逆作亂李俊之忍心棄母或遭顯
戮或被天刑真寒齒頰汚簡編矣所謂明有王
法幽有鬼神彰彰不爽也彼世之滅絕天理肆
行罔忌者可勿懼歟

論曰天地之所以萬古常新者人心也人心之
常變不渝者止此忠孝節義之真性也無地不
生無代不有亦顧人之自命何如爾廣靈前賢
若伊古王李諸君子後先蔚起運會雖殊成就
各異要其直方剛大之氣固有與日月而爭光
者至夫袁兒感父朝海還金以洎見危授命栢
舟矢志者雖閭巷庸行閭闔令範然皆出于忠

孝節義之真性所謂無地不生無代不有者豈
其然乎後之人亦同此心同此性也豈曰不可
學而至哉

祀典志 五

叙曰虞書禋于六宗徧于羣神而祀典始於此
矣故建邦育民

社稷山川實式靈焉若夫

闕宮薦侑普天共舉春秋祭祀非祇昭典禮飾儀文
也故腍碩肥腍民力普存誠則動敬則格耳至
於瓊樓紺宇歷代雖有崇尚然典禮弗載方今
聖人在宥懷柔百神寺觀存而勿廢毋亦其教有不
可泯者在乎志祀典

壇壝

社稷壇

城北里許春秋致祭豕二羊二鳥帛二俎豆各九

風雲雷雨

壇

內有山川城隍城南里餘春秋致祭豕三羊三帛七俎豆各七

八蜡祠

西城

數十武春秋致祭一先齋二司齋三農官四郵表燬五猫六虎七坊八庸豕一羊一俎豆各五

邑厲壇

城東里許九清明日七月十五日十月一日遵照禮部劄付置備牲醴羹饌設壇誦經祭祀閭縣無祀孤魂等眾以本處城隍主祭善者享之惡者逐之

學廟

先師殿

配哲在內春秋致祭豕五羊五帛七祭品遵照祀典以復聖顏子宗聖曾

子述聖子思

啟聖祠

在先師殿後豕一羊

先賢孟氏

先儒朱氏先儒程氏先儒周

氏配

兩廡

先賢先儒豕一羊一帛一祭品遵照祀典

名宦祠

在戟門外東猪羊祭品遵照祀典

明

葉公時茂

蒞任之初督建城池雖上檄迫切公仍以佚道使之人民效力勞而不怨

孟公繼先

城垣頽廢不堪保障重築衛民金湯鞏固

喬公密

城踰百年壯麗如初

韓公希龍

剔弊除奸矜鰥恤寡吏畏其威民懷其惠

國朝

杜公汝浮

賦性耿介堅守清約卒於官

范公發愚

築堤瀦水關無衝崩之患身勤捍禦城有保全之功地方安堵士民謠思

焦公恒馨

修學造士留心文教催科不擾輸將恐後逃民復業地方起色

朱公 彝

秉政慈良愛民如子偶因公事註誤遷調

論曰宦以行道豈為名乎然宦不可有務名之

心尤不可無勵名之意宦不勵名則亦持祿養

交已耳古之龔黃卓魯又何稱焉孔子曰君子

疾沒世而名不稱非無令名之患而無實致其

名之患也蓋官無論尊卑苟有功施社稷德被

蒼生者雖數傳而後莫不歌甘棠誦孔邇者豈

僅以其名哉秉懿自在人心不可泯也廣靈自

肇建以來賢令不知凡幾然考之祀典名宦寥

寥宋元以前邈不可稽迨自有明建造城池之

葉公時茂重築補葺之孟公繼先鳩工砌磚之

喬公密秉公蒞政之韓公希龍並祀春秋此外

缺焉無聞

國朝四十餘年召父杜母循良接踵廉敏正直若杜

公汝浮守城殺賊若范公發愚修學造士若焦

公恒馨潔已惠民若朱公彞皆有功於民社
士民欣然呈請願薦明禋理宜載入祀事以
桐鄉魚麥之意可謂不僭不濫豈徒侈告潔告
虔之儀文而已

鄉賢祠 在戟門外而猪羊
祭品遵照祀典

後魏

吏部尚書靈壽侯古弼 端嚴慎密公正忠誠任
理事務之繁益優文學

奏減上苑之
費錫惠貧民

司空河南伊馥 勇健稱雄智才見重

司空相州刺史庾葉 性公平臨戎智勇
名冠諸將功震一方

元

大寧路總管聶諒 肅政惠愛
顯猷垂譽

元帥張守中 武勇稱奇
屢戰克敵

明

戶部江西司主事王尚文 扈從狗節忠
耿不磨有傳

勅贈忠義光祿寺寺丞李景 擢秩西華宰邑中
州劇寇縱橫督民

捍禦眾寡不敵城陷捐軀
忠義著聞超贈京秩有傳

論曰卿大夫沒而祀於社禮也然德不足以型

廣靈縣志
方行不足以垂後則名湮沒而不彰者可勝道哉居鄉而有祀於鄉固不在科名爵秩之間也若賢而不祀無以昭崇報之典祀而非賢反以貽俎豆之羞一將一享何可濫歟廣靈如古尚書伊司空庾刺史聶總管張元帥諸公立朝大節彰彰難泯嗣是以後流風代作至於有明若王戶曹之扈從狗節李西華之罵賊不屈尤其特著者也謂不足以光俎豆而勵來茲哉但時雖分遠近而典禮之修舉不殊固當興廢起墜以昭令德而崇邦典者也

祠宇

城隍祠

在教化坊西

正殿寢室

司房俱全

內有誠慶樓

上下

八角四週玲瓏左鐘右鼓甲于諸邑四月初十日報賽

玉皇廟

在北關外

關聖

廟三

一在南城門外一在東關門外一在東臺東門外

龍神廟三

一在社台

山一在北關東門外一在壺山北

玄帝廟二

一在南關水巷門內一在北瓮城

北嶽廟

在千福山 豐水神祠

在壺山頂 東嶽行宮

在蕙花村東南

禹王廟

在縣治前 三官廟

在東臺東門外北 馬神祠

在城南門內西

文昌祠

在南城門樓

奎星樓

在城東角樓

寺觀

聖壽寺 在城北街西隅 大士庵 在南關 興勝寺 在龍虎岩 白羊

寺 在白羊村 周圖寺 在唐山巔 石佛寺 在唐山裕 天井寺 在周圖寺

東聖佛林 在直峪南山 石湖寺 在留老山 三教寺 在翟家

西照寺 在廻嶺北 崇善寺 在泉南 安堅寺 在留老 聖

泉寺 在宜興南山 老君堂 在鄭家窑 觀音寺 在峯西村 板塔寺

在大山頂 柳溝寺 在柳溝庄 保真觀 在縣西二十里 集仙

觀 在縣西三十里 凌霄觀 在縣東南 八角寺 在

角通村外 論曰自祭義不明人心狂惑匪僭則亂匪淫則

誣矣先王憂之爰制典禮令有司各以其職修

歲時之禮明德薦馨無弗致力於神者所以崇

功報德協幽明而承休嘉也至於佛老之學虛

無清淨雖不可為訓然而勸善遏惡誘眾化愚

亦神道設教之義乎若夫惠政及民懿行範世

列之俎豆間凡以鼓勵天下後世也豈可與僭

亂淫誣者同日而語哉

鳳臺縣志

國之股肱豆則足以效天天下於甘也貴也與也

亦師其婦也之義也夫夫專其文也其精也其

樂也其樂也其也其也其也其也其也其也其也

也其也其也其也其也其也其也其也其也其也

也其也其也其也其也其也其也其也其也其也

也其也其也其也其也其也其也其也其也其也

也其也其也其也其也其也其也其也其也其也

藝文志

叙曰文以載道也六經皆明道之書先儒謂人

苟見道六經皆我註脚此言良然昌黎曰易奇

而法詩正而葩春秋謹嚴左氏浮誇韓子原道

以論文而慎其辨如此藝文可易言耶廣靈邊

地少文凡所謂詞章詩歌記載寥寥然古人立

德立功而終以立言則碑銘傳記稍有關於邑

典者烏容不撰次成帙繫之終篇哉若徒矜風

雲月露之形工雕蟲繡篆之巧則漢賈山博極

郡書猶不得爲醇儒李守素通曉姓氏世猶號
爲肉譜於治道何裨焉志藝文

文 重築廣靈城池碑記

奉政大夫熊瑋 豐城人

自秦廢封建而制郡縣郡有守縣有令其來久
矣然考周官縣正之設轄四百里封域春秋之
時列國相吞并多以其地爲縣而未有郡名是
縣先郡而設重可知矣兩漢因秦舊制晉宋以
來有能治其邑者則因報以大郡而加進賢之

秩北齊後魏用人始濫而士流耻居之逮至隋
唐法制寢密乃復驗其簡僻衝要之處戶口多

寡地資美惡以爲等差降及趙宋尤重其事治
其邑者更署其名曰知縣名雖小異其於古制
則一也明太祖龍飛淮甸混一區宇迺如宋制
首定州縣之長特加殊禮良以生民休戚所係
不可不重其選也弘治紀元之八年沙河孟公
繼先奉命來治廣靈其地臨邊土瘠民貧素號
難理非才通識敏之士或不足以有爲也侯之
到任首以課農興學爲務平催科清訟獄不苛

不擾民甚便之尤慮縣近邊境無以保障斯民
雖有古城年遠傾圮欲修築葺理以爲保障之
具於是申達於太守紀公經綸轉白於都憲侯
公誠之暨守巡大叅丘公璐賈公定皆允其請
不斂民財設法措置庀材鳩工各效其力南北
城頭創建鐘鼓二樓高大嚴正太守親書以爲
之扁關外東西門樓亦如之防範周密事多類
此起工於九年三月落成於十年九月城郭樓
櫓煥然一新足以聳人之觀瞻壯邑之金湯矣
侯蒞政未及三載政通人和百廢俱舉邑庠諭

金紳等走書備述其事命生員李九舉張鸞正
余文以爲之記余惟侯之嘉惠斯民博矣旣教
養之周尤保護之至真無負於民之父母哉雖
然侯之茂績懿政固聞於今日矣曷不觀諸在
昔者乎卓茂由密而陞太傅周榮自郾而擢尚
書魯恭起中牟而官至司徒皆由治邑獲其褒
寵之榮也侯若不自滿假益勵厥志益堅厥守
殆將與曰茂曰榮曰恭齊驅而並駕者矣遂爲

之記

輓包廣靈城記

翰林院 劉虞夔 高平人

夫城盛也所以盛民也易曰王公設險以守其國惟城斯險惟險斯固民之盛因之郡邑不可無城也尚矣但築于土者厥功若易而難于悠久惟包之輓則金湯鞏固而利及萬世當事君子諒必得上籌焉廣靈福山拱其北壺水繞其南昔人稱形勝者亦歸之然邊郵伊邇□□奔馳民僉橫罹鋒鏑前令尹東光王侯春鑿土木之變始謀重築延袤三里許若堪保障而禳久傾圮保安張侯理南暨馬侯承志相繼修葺視昔頗可觀而悠久則未也隆慶辛未喬侯甫視篆登城眺望憮然興嘆曰斯城可以衛吾民乎今天子聖明□□乞和邊境寧輯然未雨綢繆古人所戒及是時而包以磚保無虞矣會督撫吳公巡閱邊圉令郡邑土城者磚之檄至侯欣然喜曰償吾志也乃謀諸守備程公萬里典史吳橋宋汝楠及邑之薦紳耆耆量地度基計工

分力慮財之匱也請給於內帑白銀七千餘兩
恐民力綿弱借蔚渾民壯若干名又簡省祭王
宦等及陰陽之勤厚者分董之衆聞命若踴赴
義若趨砥礪伐諸山薪薰取諸野輒垣成於陶
甕餐餽於傭殫力祇役弗緩弗亟侯公暇躬蒞
其地檢勤惰而勸懲之以故動雖衆而閭里不
警勞雖大而功爲易就未朞年而雉堞暈飛巍
峩屹立厥績告成矣美哉洋洋誠萬世之利乎

城周圍三里五分仍舊貫也石基三尺磚入五
聯與堅久也垣高四丈女牆七尺杜侵侮也門

樓二角樓四遠觀望也敵臺有八上置舖舍便
防守也壕之深闊俱三丈固地利也非侯慮周
而識遠謀定而畫詳胡能底績若是耶是役也
經始於萬曆甲戌落成於萬曆乙亥侯諱密字
汝登別號東滄陝西同州人也乙卯鄉貢進士
今陞霸州刺史廣靈以侯行而功不可泯俾余
掇撫其槩若興學校禮薦紳卹孤寡墾荒田鋤
豪右節冗費操堅不改廉勵無求善政種種將

必與斯城俱垂悠久者民之口碑自在焉

廣靈縣重修廟學記

翰林侍講張天瑞 清平人

今天子卽位改元弘治春三月上旬吉視學先期命有司修飭廟學以何蓋崇儒重道爲天下先卽古昔聖帝明王繼天立極君師億兆之盛意也亦將由此責天下郡邑之有司其亦當仰體聖明於萬一哉廣靈邑屬雲中戰國代地也國朝宣德間卽有廟學以隆聖賢祀事資師生講習時就簡畧規制弗稱月日邁征寢就頽圯適東魯寧陽程侯來宰是邑滌篆餘卽謂學展禮先聖賢已而進諸生暨儒師詢廟學廢置訖旋卽視事蓋中已有定規不預言也爰考滿政通人和年穀乃登百廢斯舉工鳩不苦材庀孔良民無驚畏費有酌量始新大成殿爲間凡五深四丈廣六丈高如廣之半有奇瓦砌琉璃木飭青碧宣聖配哲悉以塑像次新戟門爲間三高二丈四尺廣三丈七尺東西廡爲間各五深廣高如殿之半諸賢位悉易以木主次新櫺星

門爲間如戟門數明倫堂日新時習二齋亦如之而堂之左右翼以兩間爲廂房其一供宴息其一貯史籍深廣高視殿之制三之二儒學門則自東移之櫺星門右與南山黃花嶺相直後踞城垣前迎高阜左右闕壯視昔有加射圃則移之學宮之西剏一亭曰觀德於號舍厨庫祭器罔不畢舉而其扁揭則皆韓黃門愚夫書也是役也興工於弘治乙卯春三月落成於是歲

秋七月吉其察察家師生輩莫不相慶曰吾侯此舉一時之盛事矧六事俱舉而此則六事中第一

一事不刻之石其奚以傳乃介書於予爲之記。

惟曰凡有興作政必通人必和事乃克濟以侯之政事皆得其宜以侯之人民皆得其歡心以政事以人民旣通且和如此所以仰體聖明崇儒重道君師億兆之盛意而爲此聖賢祀事師生講習之盛舉非其心之存於中者有素而其才之發於外者有爲殆不及此又况教化之所由行人才之所由出悉此焉賴使凡爲有司皆

程侯若則夫聖明之責望有司之職任其有不
能仰副而畢舉者哉若侯之事功信可紀也遂
備書俾刻之侯名觀字子昇以詩經擢成化丁
酉鄉貢進士初授蒲州學正教成晉今職云

重修學廟贊

有引

刑部尚書魏象樞蔚州人

聖道之大如日月經天如江河行地無微不通
無幽不照學者仰止宮墻自少至老日用飲食
五常萬善孰敢不敬守我孔子家法哉廣靈

貧邑學廟久傾絃誦間歇今邑侯焦公來蒞茲
邑能知大體首先倡捐而鼎新之以崇祀事課

諸生典禮備文教興矣工成屬余一言為之贊
贊曰讀聖經感人心學宮茂草任銷沉修蘭若
損多金世俗江河已到今彈丸邑窮子矜仰止
宮墻歲月深瓦礫亂風雨侵補葺還愁力不任
嗟乎嗟乎事其事空谷音

重修學廟序

譚

愷

邑人通判

學宮治平之本也三代而下稱盛治者莫若建
武光武息馬論道親祀闕里傳至孝明臨雝拜

老執經陞座闢橋門而觀者冠帶雜遝故一時
風物莫不炳炳燁燁焉推之郡國下邑各立學
校則任茲土者不惟簿書期會而已必以教化
爲大務俾君子由以育其材小人亦以輯其志
泮宮數仞豈在廟貌榱桷云爾哉廣靈素稱菁
莪蔚興英賢繼起其由來尚矣近年兵燹頽仍
凶荒叠見士子謀身尚且不遑奚暇計及學宮
乎仰瞻 廟宇大成殿墜瓦飛鴛四維雖尚可

支亦有風穿雨濕之象兩廡俱斜欹將什數椽
零亂再觀戟門櫺星門暨泮賢名宦兩祠棟折

宇摧垣頽壁破牛羊伺以爲囿市人走以成衢
肅穆文明之地竟爲茂草瓦礫之場矣邑人士
雖歛歔感嘆終不敢輕爲修舉邑侯焦公甫下
車謁 廟目覩心慘慨然以修葺爲任爰集紳
衿而謀之予焉先捐其貲因思工程浩大物力
艱難非藉衆助莫能成也諸士志不忘本無拘
多寡隨其力之所至而樂輸之庀材鳩工亦能
次第就理倘異日工竣將見 廟貌新則禋祀

肅教化廣則德業進甲第踵興人文蔚起矣聶
王諸公豈獨耑美於前哉余願諸同志無負邑
侯興學造士之苦心以共勦盛舉云爾

重修學廟引

焦恒馨 邑侯

昔王會自青州發解廷試皆元世傳以愛惜字
紙之報可見稍有功於 聖門者卽爲 聖人
之徒掇巍科取上第不僅在尋章摘句之家也
本縣翻閱前簿凡輸助姓名皆縉紳士子無非
仰瞻 聖學沐浴教澤者至有祖宗食詩書之

利而身外於宮牆孫子置風雅之林而心懸夫
芹藻雖刀筆之吏何嘗不以文藝爲工卽商賈
之流未必不以鉛槧爲尚學廟之關於人心風
化孰不知其重哉使以爲微末槩斬而弗錄是
阻人以向道也甚非吾夫子循循誘人之善法
矣本縣用是以泮水爲津梁以橋門爲覺路爲
諸人勸今 先師殿及明倫堂雖漸次告竣而
先賢兩廡鄉宦兩祠櫛戟兩門肄業兩齋週圍
垣墻門戶及土塾石基尚費工甚鉅有傾心向

化雅慕儒宗爲世世之書香計者或輸金或捐粟或助工作或資物料量力盈絀隨心登列同襄盛舉適觀厥成異日者塵埃宰相白屋公卿乘桃花浪煖而醉卧江頭看桂影天香而遨遊月窟知吾夫子感應當必與愛惜字紙者作平等觀矣故實著之以爲引

增修廣靈縣文廟記

教諭任之琇

河津人

文廟之設由來遠矣明洪武初卜建宣化坊西北旋徙平政坊西今廟卽其地也迄正統成化弘治嘉靖萬曆中某公拓大某公重葺某公增

設歷二百餘年規模粗就載邑志可考古制大成殿後爲明倫堂時習日新齋東壁特立一字爲啟聖祠南與文昌鄉賢兩祠層次貫聯今

皇上御極之五年邑侯石篤生廣文郭光儀重興土木以啟聖祠明倫堂易地改作非復昔觀其有所見而然與是未可知也旣而邑侯焦恒馨相勢度宜踵事增華殿廡雖曰仍舊而庀材甃石丹碧輝煌則有加焉若戟門若橋池若櫺星門

罔弗安頓得地兼移鄉賢祠與名宦祠相向猗
歟休哉廣靈文廟視隣封稱巨觀矣更念文昌
祠廢久學舍無存堵將並舉以左遷就道未獲
如願厥後訓導段國燦勅豎明倫堂大門三楹
及二門兩角門門外照壁亦云克承先志然猶
有議者廡內尚屬土地每瞻禮殊覺無光明倫
堂下方臺甬道向以土築日就傾圯鞠爲茂草
不無九仞一簣之感壬戌秋余秉鐸伊始邑侯
李公諱煥斗謂余曰前人爲其難且大者此脩
脩者事吾儕尚憚爲耶爰協同城文武官倡捐
示勸一時鄉士夫與夫諸弟子員無不慨輸共
襄其事爰筮吉命工悉鋪砌以甄於戲前諸君
子備極經營迨及今茲聿觀厥成一任泯沒而
不傳奚以勵將來重學校哉故勒石併記

重修城隍廟記

巡撫都

雷復

人

先王制禮皆以義起者也禮曰凡有功德於民
者則祀之然城隍之神其祭昉於何時乎自唐
以來郡縣皆立廟以祀後世因之所以保障生

民通節乎內外默相陰祐厥功彰彰於旱蝗則
禱之於癘疫則禳之於歲時則報賽之視他祠
以令式從者爲尤謹非所謂有功於民而祀之
者乎廣靈之有城隍廟蓋舊制也歷年茲久旣
敝且陋令尹恒山孫侯一日行事祠下慨然嘆
曰廟所以棲神今其廢壞無以蔽風雨則神且
弗棲况舉吾祀乎於是捐資命工掄材以葺而
新之民皆勸趨以就工役無敢後先闕其弘基
增其舊制前爲堂肖神像於其中後爲寢室外
爲三門庖福有次望痊有所繚以垣墻堅其屨
鑰堦除之下樹以名木鐘鼓籩豆百廢俱舉規
模制度輪奐交錯經始於正統九年秋七月朔
旦落成於明年之六月望日賓從僚吏胥胥祠
下乃以羊豕告祀焉復不鄙遠以書屬俾書其
事惟夫令之政治民事神而已邑之休戚舉係
於令神能警動福禍以食乎民古之人必先成
民而後致力於鬼神則民和而神乃降之以福
否則黍稷雖馥神其吐矣此其所以爲神民之

廣靈縣志
主也孫公之令廣靈盡除前令之弊以廣維新
之化薄於奉養而厚於鬼神卑其室廬而弘其
廟宇故能蕩沴爲祥化癘爲和嘉谷用登民俗
丕變神用歆享百靈感從公可謂知所當重故
爲不悖於義矣是用勒之石以垂永久云

重修關帝廟募引

縣丞 王五鼎 邑人

事苟切於風教有其舉之莫可廢也况忠孝節
義之於人盖有不容自己者耶 漢壽亭侯關

夫子廟祀徧天下千餘年間凡有血氣心知敬

事罔射者何歟豈非以忠義之氣之在天地有
不可磨滅者哉縣治南門外有 夫子廟其來

舊矣曩因香火無資緇黃星散而暮鼓晨鐘蔑

如也幸逢豈弟父母張公蒞吾邑政簡刑清與

民休息年來人民漸復市肆漸熙山川草木皆

有起色每於朔望展禮時惻然念曰 夫子立

萬世綱常賴以維風振俗今殿宇隘陋固不足

以壯觀瞻且精舍爲焚修地可令其頽圯而不

爲之所乎遂自損養廉之資命莊葺而式廓之

衲子芳慶慮工浩用繁恐難告成白余為募帙是舉也非徒作十笏以資益色身已也從此而莊嚴法像丹堊榱桷使天下之人拜其下者莫不懼惡悔罪遷善改過而不敢越其有切於風教為何如于是益信忠孝節義之於人盖有不容自己者也凡願成德心者乞解杖頭所餘以為庀材料工之助較之助饌桑門作越貧窮海者大相懸絕矣若夫嚴五戒以勤修定慧則又

創建橋廟記

比勸分內事耳余願滅嗔癡以觀成焉是為序

廣靈城北古有野水正東遂壑一渠春則地澤澗灘夏則水潦交集悍怒衝激兩門相視虓騰驚魄而不敢涉行旅深以為患茲郡鄉耆李公鎬暨子季父壘鏡志興作與子父致政臨洮通判鑿予師柘城縣尹趙公昌齡暨子伯兄見任竹谿尹汝清謀曰橋梁之設為利民也今茲水渠為民之患可修橋梁以濟之因以橋事告於先任父母武邑滕公璧公即諾曰橋梁不治有

司之責也吾何敢辭於是會諸掌教武功傅師朝用司訓河澗王師希濂縣幕武功王公鴻遂將近縣之有車者給錢輪車俾運土石仍發廩粟數十斛以食工匠旁近橋者咸以橋成亦其所利遂皆欣然趨事施財暨四方之願助者又若干人二者因燔石灰埏瓦甃載礮載鑿是甃是砌經始於嘉靖二十七年二月朔日下列三洞用石以丈計三百二十有奇用灰以斤計二

萬四千有奇夫匠以工計通七千八百八十甃築深葺堅緻完好而橋告成焉橋事既成斯民

之遊觀其上者咸以爲勝概宜棲神以欽崇之

祈其眷護俾永無虞又明年卽議建立武安

王廟於是繼任父母興平魯公師曾守府雲中

王公良臣掌教昌平趙師達司訓邵陽車師宗

湯縣幕商河張公成僉謀揆日於橋之左營基

三尋闢廣五仞卧虹畫棟跂翼層檐三楹兩牕

勢若凌雲巍然拔起中肖神像將卒兩壁備繪

輔漢殊勲玄陰深邃氣象鼎新不期年而告成

焉守祠者鳴鼓擊鐸以司香火血食之饗每歲一舉意以王之在當時威震華夏茲祠之於邊圉將以冀其陰受安攘之賜也已而新任父母京師胡公欽下車之初卽僉同縣幕莊平楊公自然增飭潤色亦樂厥成焉嗚呼昔周文忠公作鄒公橋廟記有曰世之成橋廟者有三佛老以心巨室以貲官府以力然力者或失於虐貲者或失於恠心者或失於緩今是役也得滕魯父母之力而不至於虐得二者之貲而不至於恠具是二者善此成之所以速也故備載其事垂之悠久使後之人知二者用心之勤常嗣而修之使不至於壞且廢其利將及於無窮矣予因久病祈神獲瘳故願誌其事而鐫之於石云

重修社臺聖像碑記

邑令 李煥斗 新淦人

縣治西關有社臺山屹然特出環岡面水軒廠可遠眺上有龍神廟不知創於何時相傳勝國成化間邑令程公修城取石於此夜夢神拒之旋搆疾已而悔禱乃愈因酌於神而重新其宇

繪塑聖母諸龍王像十一尊邑人遇旱禱雨於此每禱輒應去歲嘉平月余承乏是邑值歲旱不登黎民阻饑今歲復驕陽爲虐自春徂夏不雨土若焦釜二麥不生谷黍皆稿余與寅屬諸生齋戒虔誠朝夕步禱將四十日至六月乙卯大雨七月甲子又雨四郊沾足禾稼勃興官屬四民靡不舉手加額雖曰天之不愆遺斯民而實神之庇祐孔彰也先是諷經道人任真玉以久禱未雨商之居人某許以重新聖母諸龍王金身乃不越夕而甘霖果應城關士民戴天之恩而愈弗敢沒神之惠遂各醵金錢裝修神像丹雘廟宇以酌神德祀典曰能捍災禦患有功德於民則祀之是役也誠有合於祀典之謂矣夫神匪民曷依民匪神曷庇今觀神廟金碧輝煌威儀肅穆從此降福降康時和年豐余願與疇人父老明德薦馨永報賽神德於勿替矣因爲之記

重修板塔寺序

縣丞

王五鼎

邑人

間嘗讀釋典見輪迴因果之說深有關於治道也何則御世之術刑賞二大端而已天下有賞焉而未盡勸者語以天堂靡不忻然慕慕則善心生有刑焉而未盡懲者語以地獄靡不悚然懼懼則惡念止其卽古王者神道設教之義與邑之大山南巖有板塔寺前瞰壺流河後枕陽高衛東接九宮西聯恒嶽真勝地也然上雨旁風歲久傾圯可奈何衲子照徹謂不種善因焉得善果况庇國福民唯佛是依今者香臺走鼠寶蓋棲鳥而不滅金身行將踟躕於荆榛瓦礫中此豈爲比丘羞諒亦仁人長者有同心也用是屬余引一言以告募是舉也上於諸佛乞法非徒資益色身已也凡願成德心者勿徒有舌上青蓮肯解杖頭所餘以作給孤之園其爲功德也大矣且佛者覺也又以象教者也今而後璀璨紺宇莊嚴法身都之人士進而作禮因象生敬因敬生覺而善善惡惡之心無俟刑賞而油然矣其有關於治道爲何如可曰西方聖人

無補於閭浮世界也哉是爲序

重修西照大廣佑寺記

石壇

熊開楚

南郡人

廣靈之奇峰山有西照禪院不知其所自始予
攷殘碣披遺文有唐尉遲敬德姓氏在焉至宋
仁宗爲御製紀其盛迨勝國成化弘治間屢經
繕修爲祇園大觀今百有餘載矣昔時之珠宮
具闕將半頽隳過此不爲後將荒落會戊午冬
十月予同門尚寧山先生以南陽司李改授茲

邑下車甫數月而廣之人相與樂之急公總事
之暇父老子弟辦絲粒給椽瓦鳩工庀材爲西

照重光予重趼間關訪先生於廣靈清署披襟
與語良自得也適比丘性崇策筇相過以禪院
告成請爲序以勒之石乃卽其所言于予者聊
述其始末而書之不以文也抑予聞奇峰九首
之勝其山蜿蜒而磅礴其水滌洄而清冽溪谷
盤繞林木幽翳意使君星輶至止偶憇上方徘徊
千岩夕照遙矚層城丹樓如霞必有心曠而
神怡者予雖未能身歷其處予又將髣髴而得

之矣是爲記

重修聖壽寺記

庠生 李長榮 邑人

縣治西北隅舊有聖壽寺初建最古故世遠年湮碑碣殘失邈焉莫稽明季景泰萬曆間雖有比丘募修不過補理舊貌幹旋未甚鉅耳厥後兵燹頻仍凶荒叠見衲子持鉢延歲士民家鮮宿春遂致大雄殿墜瓦飛鴛天王祠風雨剝落韋馱伽藍半屬破壁頽垣僧舍香厨止存茅屋數架如來法像依然墮地而漏處矣且城爲一邑之金湯而茲寺又爲城中之法會若令殿宇摧折荆棘叢茂豈所以崇功德而奠疆域哉

皇上御極之十有八年邑侯李公甫下車元旦習儀於斯目覩心慘而嘆曰釋氏雖生天竺而其教流傳中土自漢迄今靡不崇尚想祇園雨花闡因果輪迴之說誘善戒惡默助

朝廷刑賞之所弗逮况又朝賀展禮烏可令其久廢歟卽命僧會性崇葺理言之再四奈時值阻饑措置維艱延至二十二年性崇以病告退貯

香火地租數十石餘留爲補葺之費後法洞來
寺護記集衆僧謀之曰前者我侯葺理之命此
其時也但租粟僅勺水之微安能濟滄海之大
乎邑中六寺僧人志不忘本皆願勦助悉竭杖
頭所積各湊白鏹三十餘兩同心戮力庀材鳩
工卜吉而鼎新之邑侯李公尤慮功程浩大僧
力綿弱首先倡捐復令募助幸檀那施財共襄
盛事殿址稍移而西高廣畧加前模爲楹有三
左右監壇各一遵舊制也丹墀兩側合建配殿
六間補缺畧也移天王於禪關山門於外肅法
界也方臺石砌堦下磚鋪謹儀禮也瓦脊崢嶸
聖像輝煌刻楠聖壁烏革暈飛視向之墮地而
漏處者茲則煥然改觀矣余乃知事之興舉殆
有天焉雖然苟非聚沙有人胡能底績若是耶
方今

天子明聖三教並崇我邑侯李公心存菩提率修紺
宇以宰官身作功德主俾後之人仰瞻梵宮諒
必油然而起悟羣動皈依之念爾謹記

江溧水范國輅君聘書

自

賦

詩

南村公館壁咏

李采 關中人

維石巉巉遇夜深我行何事此登臨風迎馬首
增悽况月暗天中沮壯心名利虛關猶未破乾
坤坦道自當尋一從僕入人間世奔走塵埃直
到今

次壁韻

宋統殷 東海人

山行鎮日倚雲深峭壁懸崖苦自臨地近巖疆
勞久成路疑天險失雄心風塵寂寞從誰語雲

漢昭回只此尋立馬恒山高望處分明遺恨到
于今

次壁韻

王點天雄人

山自嶙峋水自深匆匆匹馬又經臨窺銅漸短
如霜鬢仗劍猶雄貫日心敢望長楊恩再錫徒
沉細柳老偏尋逢秋久動鱸魚念雞肋應拋豈
待今

南村夜况

陳周政

風勢挾雷鳴鐘來靜厥聲更邀半滿月了然
臆明客心淵若水向此孤燈清寒鐸不可吟荒
荒圍一城萬物各有夢而我獨未寧貞介抱微
躬憂患乃復生慚彼枝上鳥寤寐總無情

斗山詩

邑侯劉審問昌樂人

天設石門最險遙萬峯壁立上通霄中流砥柱
存遺址崖畔石堂斷古橋野鳥群飛雲外語山
花隨路雨中嬌秋深禾黍鋪原隰日落牛羊渡
欄腰塞土風清人樂利邊關防固勢岩堯皇圖
信有長城壯外使來臣拱聖朝

加斗雨留詩 二首

劉審問

一入境來此處棲青山滿目樹成溪重會似覺
天有意雨阻難行好徵題

壺川域內數多山加斗從來屬勝攀今日雲由
山下起甘霖大沛慰民間

送李谷愚之任廣靈

侍讀施閏章 宣城人

素交眼底獨推君古道文章迥不群家傍清江
心共許人當燕市手重分馬蹄曉踏白登雪雉
蝶晴看紫塞雲間近襄陵多美酒不妨賓主共

論文

送李谷愚之任廣靈兼懷靈丘縣令岳邁亭

編修李顛 山陽人

臘月金門已放春登車無處不懷新恒山北亘
題詩地豐水東環待澤人問歲誰憐鴻欲盡觀
風我望雉將馴同心更憶靈丘彦為報花疆好
結隣

送李谷愚之任廣靈

檢討黎騫 清江人

十載題名重玉京今看結綬向邊城天涯別有

江淹淚水署人懷鮑叔情朔雪不侵燕塞路福
星直指鴈門行安民卽是酬 明主寒徹梅花
入御羹

視篆廣靈寄崔弘西明府

蔚州刺史來

臨關中

刺史何善狀攝邑轉生慙閭里名爲九城居戶
若三急徵因夙負頑牒以窮婪念爾哀鴻集中
宵坐思覃

每月三巡邑勞勞驅遽傳偏山多礮礮殘黍幾

家煙史隱稀公案書難樂靜便摧科吾計拙勿

若急仁賢

攝篆廣靈卽事

二一首

來臨

傲吏茹蔬樂有餘清虛莫嘆食無魚等閑片晷
了公案一日猶讀半日書

紛紛狂寇兩徘徊舉爆傳烽城上臺對語冠軍
誠喧鬧刻期令宰樂陵來

廣靈道中呈李谷愚明府

靈丘縣令岳宏譽

江南人

紆迴巖壑歷躋攀亂石盤旋行路艱塞杏不紅
花欲掃邊榆初綻莢如環翻飛沙燕隨人舞駭

逸山麈避馬還每過仙源須薄暮前村燈火近
城闌

雨後過泥泉嶺

二首

邑侯

李煥斗

新淦人

泥泉新雨後良苗挹和風昔訝村烟少今看春
澤融雲侵衣易濕馬滑步難工望入靈丘路東
皐日已紅

雨衝山路斷險似陟蠶叢行役予忘倦祈年穀
喜豐平林歸野衲絕澗飲長虹萬里西江客無

愁賦東風

豐水夜月

李煥斗

城南豐水夜鱗鱗一望平川白似銀靜影玲瓏
飛玉鏡寒光蕩漾躍水輪三更遣興花當澗十
里尋谿月近人况是清秋風景別更從何處滌
氛塵

社臺朝雨

李煥斗

清曉乘閒登社臺東南佳景望中開一川時雨
滋禾黍百谷風濤吼澗雷山邑有年今可卜天
工覆育自從來他時報賽酌龍母敢靳馨香薦

玉醅

千福曉鐘

李煥斗

千福山頭春雪消
兩川煙景夾山腰
晨鐘忽發天邊響
大覺初回夢裡蕉
衲子入雲飛錫遠
香厨隔澗引泉遙
上方城郭聞雖近
莫遣笙歌到寂寥

斗山積雪

李煥斗

翠巖迢迢南斗開
瓏璵積雪隱蒼顏
全封鳥道無行徑
迥入銀河絕仰攀
玉峽盤回龍橋橋
巖深鎖月灣灣
虛疑詩思侵人骨
翹首雲中見此山

壺泉春柳

李煥斗

平原野望一山孤
別有風光到玉壺
幾度尋春詩未就
數回遣興酒頻呼
雨餘烟柳仍含綠
風過巖泉似濺珠
莫羨河陽桃李色
青青兩岸更堪圖

飛鳳晴嵐

李煥斗

一道青山北郊橫
傳名飛鳳跨遙天
摩空欲吸

桑乾水展翅應遮太白巔四序煙嵐迷出入終
朝青靄異推遷翩躚宛似來儀瑞重樂虞周擊
壤年

聖泉松風

李煥斗

古刹深藏倚澗阿何年選佛在烟蘿兩崖削壁
窺天少一水通幽灌木多谷口松濤疑嘯虎風
邊鈴閣似鳴珂登臨欲認前朝蹟尚有莓苔碑
可磨

白羊暮靄

李煥斗

重重紫色白羊頭聞說仙人頂上遊殘日石林
紅靄靄黑雲牛馬晚悠悠夏王荒隴狐狸夕延
昭孤城虎豹秋翹首故園家萬里西山一望可
勝愁

廣靈紀事

五首

李煥斗

歲在庚辛會雲中旱魃狂終冬無點雪入夏總
驕陽風霾天不見沙湧地皆黃早土如龜裂牟
麥多彫傷平原如釜焦種穀少生秧官民相對
泣齋肅禱彼蒼遇廟卽頂禮僕僕烈日行五旬

無一應激切摧中腸

偶聞羽士言有術能致雨伐鼓再敲鐘宣科說
法語忽向山之巔忽向水之滸忽然拜龍王忽
然祝聖母許以賽羊豕酌以歌工警前道列緇
徒中央拜童子而我與師生豈敢辭勞苦迨至
六月終商羊方起舞大雨雖霽霑苗枯半已死
苗枯難再生雖生不結穗續種畏嚴霜雖耕亦
委棄以此秋獲稀頻年遭歉歲城鄉米價騰蹙

饑饉此貴戰夫一糧原野醉人解奇端兒女鬻飯
去商賈以爲利軍需方脫巾往往羽書至有司

當此時忍以鞭朴繼稿日空躊躇潸然淚雙涕

孟冬承府帖煮粥哺饑餒開版十月中明年三

月止頒金豈能繼倡捐自令始令貧初蒞任艱

難費料理買米不百斛曷克周百里粥熟饑民

集東關如聚蟻老穉各成行分瓢戒擁擠得粥

未敢餐將歸再酌水家有凍餓人和糠均口體

官粥那得飽殘生延眼底遲至或粥罄補以勺

合米胡以弗多給吝惜非得已

饑饉封疏入 宸衷篤西顧 渙號頒大府使臣
來旦暮赤子動歡呼 威稱所遇殊 惟有逋差者
始悔向來愚 兩度王居渙 皇仁猶惓惓 六月
布 綸音租蠲三十萬 流離各懷歸 襁負猶愁
晏自古厄歲并蠲賑亦常行 此日非疇昔中原
方用兵 司農時告匱 大府欠克盈 恤難先邊土
真荷

聖人明

宿西照寺二首

寺有九

李煥斗

歷盡羊腸到此山 九峯禪院隔人間 行雲流水
如相望 遙見殘僧冒雪還

古木林中古祇園 朝看麋鹿暮聽猿 僧房絕勝
僧居少 日永松堂晝掩門

觀暖泉三首

泉在蔚州距縣三十里

李煥斗

方池如鑑瀉清湍 終古悠悠不作瀾 昨夜月從
潭底過 素娥忘却月中寒

此水三冬湯各然 深潭疑有火龍蟠 若教灑作
甘霖雨 天下陽和共一般

尋得源頭見此湍清同易水不同寒水堅萬壑
嚴冬夕別是天山第一觀

直磔道中

李煥斗

幽谷盤旋十里陰兩崖中關見天心回頭駐馬
還相望疑失歸途何處尋

初夏亂嶺關遇雪

李煥斗

冒雪登崖行路難臨高自悔着衣單邊山夏月
如冬月只少梅花拂繡鞍

過火燒嶺

李煥斗

策馬崇岡行步難杏花枝上鳥緝蠶自從身作
延陵長幾度衝寒過此山

會課示諸生

李煥斗

我昔臨斯邑諸生多少年衣冠何濟濟詞貌亦
便便期爾青雲器滿殼以當前倏忽六七禩諸
生歲月遷 皇家兩羅士麟鳳未爭先諸生不
自振莫道有司愆隣封各脫穎爾徒空羨淵詎
獨諸生耻余顏亦赧焉懷哉須結網及時勿遲
延高山勤仰止宮墻勉鑽研白雪無凡調青雲

在目前杯酒聊相告論文效昔賢勿嗔多責備
交以直道全

豐水夜月

王五鼎 邑人

風靜波恬繡縠鱗寒光曳練白如銀
鮫姝就沐
奩開鏡蟾窟飛香桂滿輪
澣畔雙棲窺影鷺沙
頭獨照不眠人
長空似洗水壺沁
倒蘸遙峯不染塵

社臺朝雨

王五鼎

迢鬱龍宮鎖絳臺此山生面又重開三農夏日

晴甘此二月春風起
驚雷海氣浮
空天際立
最光飛溼望
中來年年乞與
神靈覓禾黍
含滋若醞醅

千福曉鐘

王五鼎

曉鶯初囀雨初消
嶺外烟籠萬木腰
仙梵喚回清影
鯨聲驚破黑甜焦
悠揚入座塵心靜
輾轉離人鄉思遙
欲叩上方參寶乘
航無舟子渡寥寥

斗山積雪

王五鼎

碧嶂峻嶒插漢間，凝寒倏改舊時顏。泉封石乳源雖遯，玉掛藤鬚徑莫攀。素練高懸當絕頂，玻黎冷甃隔深灣。遊人入夏全無暑，儼似青平第一山。

壺泉春柳

王五鼎

東臯屏障一城孤，仙令清標映玉壺。曲度薰風琴韻滿，楊垂芳蔭鳥聲呼。春晴乍入舒青眼，曉露輕滋貫碧珠。寒食攜尊流水宴，依然修禊永

飛鳳晴嵐

王五鼎

春輝祗向丹山集，何自高飛遠蔽天。儀舞霞光翻落照，音鳴風籟度遙巔。融融霽色春冬互，滴滴寒藍早暮遷。我欲耕烟種瑤草，結廬深處可忘年。

聖泉松風

王五鼎

花宮葢利隱岩阿，每到春深長薜蘿。清磬高宣歸鳥靜，蒼虹斜映夕陽多。懸崖瀑布飛瑤雪，入耳寒飈展玉珂。坐久悠然神悟遠，塵氛百斛自

廣靈縣志
潛磨

白羊暮靄

王五鼎

風吹殘照掛山頭
倦鳥高飛雲際遊
霽色平分烟漠漠
嵐光欲動思悠悠
孤城寂歷喧殘角
萬木蒼黃染素秋
牧豎歸來樵子下
商歌一起使人愁

豐水夜月

庠生 白屋隆 邑人

寒潭幽澈躍潛鱗
浪蕪堆花簇爛銀
蜃母遺珠升海橋天絲爾駕銀水輪中宵湛露虛涵影一
片清光冷照人
回顧悠然沉萬籟
水雲縹緲靜無塵

社臺朝雨

白屋隆

幾回憑眺獨登臺
山色參差曉未開
祠宇暈飛聯碧漢
梵音傳偈隱殷雷
斷雲拖墨穿林出
積靄移陰拂面來
四野蒼茫圖畫裏
神功寂若似傾醅

千福曉鐘

庠生 白屋蛟 邑人

列壑巖迴積霧消
諸峯綿亘美人腰
嶽宮諷梵

飛花雨福嶺鐘音破夢蕉百八敲殘聲尚裊三
千悟徹境非遙吾心自有惺惺在何必辭喧度
寂寥

斗山積雪

庠生 王振斯 邑人

崔嵬迥出白雲間春去秋來縞素顏嶺上梅花
何處問望中鶴影杳難攀碾成晶玉原同色踏
破瓊瑤第幾灣姑射羅浮清可並何須海外問

三山

盡泉春柳

白屋隆

尖聳蒼崖片石孤山頭日圓曉提壺澤濡新柳
千章潤風激寒泉萬竅呼嫩葉舒金灑湛露清
波激玉漾明珠右丞若使重相見一幅烟稍望
裏圖

飛鳳晴嵐

庠生 白文煒 邑人

如鳥斯飛綿北郭清輝霽色亘長天九苞試舞
西岐曲片翮橫遮北嶽巔宿霧眠雲終不改朝
藍夕翠屢更遷何須噦噦博空谷歷盡滄桑勿
紀年

聖泉松嵐

白屋蛟

何年蘭若結山阿門外蒼松繫葛蘿一道虹飛
珠玉灑千尋翠擁霧烟多涓涓遁響鳴琴瑟謾
謾清音曼珮珂景僻常留車馬跡至今佳勝未
曾磨

白羊暮靄

庠生 白得止 邑人

初平叱石到山頭朝夕常供豕鹿遊芳草迷迷
斜日黯蒼烟冉冉白雲悠徑紆轍跡迴行馭嶺
度鴻聲送早秋凝睇有情舒咏嘯莫將閒緒掛

閒愁

豐水夜月

庠生 劉堪 高平人

壺波滌繞蕩金鱗一帶清漪水色銀日射紫瀾
風作錦夜輝碧澗月穿輪觀湄應有驚濤志臨
渚還思破浪人雷動中天重奮翮從龍矯矯出
紅塵

社臺朝雨

劉堪

化日遨遊陟石臺一時豈會景雲開桃風蕩漾
頻添瑞杏雨滂沱故發雷禾黍有成資地力豐

亨胥慶白天來六宗祀典煌煌載敢竭
寶醅

千福曉鐘

庠生 李長榮

日出扶桑烟霧消松間殘月去山腰花宮鯨韻
清塵夢禪舍莓苔映綠蕉諸界乍聞天路近一
空方悟世緣遙年年風物不相異惟有寒雲鎖
寂寥

平山積雪

李長榮

遙峯隱隱碧雲閒一夜冰花裹舊顏綴玉瓊枝
松欲折尋梅瑤圃徑難攀美人踏月從何覓高
士移床第幾灣說與南人渾不信夏深猶見雪

鋪山

壺泉春柳

劉堪

莫嫌村遠野峯孤自有清湍映玉壺作賦臨溪
將筆潤乘春載酒把朋呼風吹碧岸垂長線雨
注蒼波泛露珠自是先生愛五柳何人錯認朝

川圖

飛鳳晴嵐

劉堪

金城北倚鳳山立雨後晴看別一天垂翅高岡
雲繫彩鳴階在竹錦鋪巔蔚蘿風渡谷回暖莎
水環襟影欲遷世際文明時兆瑞早知 皇運
莫長年

聖泉松風

李長榮

平生常履梵王阿時有天花墜藤蘿古殿雲封
人徑少禪關日永鳥鳴多松風有籟聞絲竹車
馬無塵到玉珂一任浮雲縹緲去青山萬古孰
能磨

白羊暮靄

李長榮

春融芳草滿山頭鎮日喜看鹿豕遊王石叱來
遺跡遠魯戈麾處夕陽悠險因天設秦關古景
被風彫漢塞秋歷盡興亡看此夕白雲紅日不
勝愁

壺泉春柳

府庠 劉禮德 邑人 生

一望平川勢自孤忽驚身已在蓬壺日斜水殿
文瀾動波撼山根亂石呼樊圃却栽陶令柳飲
芳能復孟嘗珠詩家清景從何覓朝雨寒烟總

畫圖

社臺朝雨

劉禮德

山色當軒水近臺
清宵望雨喜顏開
飄殘林杏餘離火
掠起松濤出震雷
物潤郊原添地碧
風吹麥浪白天來
誰家老父攜鋤過
預喜年豐醉野醅

七夕歌

康熙癸亥同廣昌令杜讓水廣靈令李谷愚作

岳宏譽

今夕何夕秋氣清
月色皎皎雙星明
天涯客宦

雲中城故鄉兄弟無限情得交李杜青雲名鄉

杯握手裏腸傾長
嘯擊壺數平生
欲歌欲泣

感并古道相勗酌
我觥同心甬勉各
邁征蛩蟹

唧唧堦下鳴絺衣
蕭瑟涼風驚起立
庭院拂素

英仰視河漢天半
橫青鳥白鶴舞玉
京丹宵滴

露承金莖披襟散
步浩氣盈此會非
偶疑蓬瀛

不知天上之佳期
雲駟駕果否成
遙憶江南

小兒女殷勤瓜菓
月中擎

七夕歌

和靈丘令岳邁亭同廣靈令李谷愚作

杜登春

秋風獵獵秋暑清
寒光一片雲中城
同官握手

多含情含情不語惜身名床頭有酒臣盡傾酒
酣耳熱感慨生十年浪跡寄幽并對客怯飲樂
飛觥泛駕之馬勉長征不堪鞭策徒悲鳴况當
峻坂心骨驚岳生李生天下英語語經術非縱
橫不愧循良著 帝京柏霜梧雨雙闕莖挹彼
瓊液爭盈盈我羨二子將登瀛瀛臺避暑側席
會會須報爾學製成今宵乞得天孫巧好把機
中美錦擘

七夕歌

和靈丘令岳過亭原韻
同廣昌令杜讓水作

李煥斗

銀河耿耿秋風清雙星欲度碧霞明有客長歌
古平城天涯兄弟自多情白門才子早知名陸
海潘江詞源傾同官何幸遂平生樂聖啣杯感
慨并夜深猶欲盡君鱗壯志擊壺思遄征二子
唱和且善鳴高談雄辯肆筵驚心期直欲無前
英牽牛織女河漢橫良會今宵勝玉京愧予班
髯日多莖朝昏黽勉如持盈蹇步豈敢望登瀛
幾回乞巧向天孫學製錦綾功未成看君掌秘
絲綸閣試把雙肩隻手擘

庚申咏榆

李煥斗

西街有榆樹一夜盡無皮問言何所去餓夫取
充饑無皮樹不活民饑生亦危枝葉延殘喘傷
心在此時

甲子除夕

李煥斗

離家方六載守土尚三邊胞與慙民牧淵水答
俸錢故鄉音問少鬚髮歲時遷度此盤花夕風
光又一年

鋤莧

李煥斗

此土原無莧種移故國看丹心如鶴頂絳葉似
雞冠不鈔盤餐便疏根雨露覆公餘時往顧便
覺客懷寬

誤載花石吟

李煥斗

昔讀方輿誌廣靈產花石乃子官此方有客寄
書覓殷勤詢父老邈然無踪跡因知古人書流
傳多失實凡事貴闕疑不獨茲一邑

論曰一代之治開乎文運大者章疏制命徵者
傳紀碑銘皆紀綱典禮所存德行風教所屬也

文獻失徵何以信後廣靈雖塞壤生斯土者非
無碩彥而官斯邑者代有詞臣然攷之故府著
述寥寥但有關於剏建源流備後來之徵信者
烏可任其散逸而失傳也若登高詠志遇物題
情又邑中方名古蹟所貽垂焉匪徒矜聲調競
工巧也彼鏤刻章句誇耀耳目雖有汗牛充棟
之富又何錄焉

補遺詩

豐水夜月

庠生周楨邑人

屈曲清漪無錦鱗晚風初起浪鋪銀珠穿碧海
隨龍領鏡啟玉臺懸素輪桂魄何緣香入澗波
光已覺冷侵人他年得步蟾宮客不着人間半
點塵

壺泉春柳

周楨

城南石頂望中孤勝裡佳遊共一壺岸柳千章
垂翠合流鶯百囀隔溪呼清泉日暖看遊鯉綠
野童歌似貫珠佳境當前與物共天然別是咏
觴圖

白羊暮靄

庠生周棧邑人

白羊故里晚峯頭
少小登吟憶昔遊
林表夕陽鴉影動
山間青靄暮光悠
虎猿嘯處千岩響
松籟寒生五月秋
回首祖居猶倦倦
秋風禾黍自添愁

社臺朝雨

庠生齊管邑人

陽和靄靄照層臺
瞥喜甘霖逐處開
飛燕引風催細雨
文龍奮甲起春雷
芄芃禾黍隴頭穰
穰豐年陌上來
每慶西成應共慰
更邀神惠

傾酌

壺泉春柳

齊管

平川突兀小山孤
山下靈泉若映壺
吹浪池邊魚藻動
啼晴枝上鳥聲呼
謾誇彭澤千層柳
且看脣山萬斛珠
花滿河陽仙令植
莫教悞認六朝圖

飛鳳晴嵐

齊管

寒林葉落群峯瘦
惟有鳳山儀九天
雨散翠凝千嶂曲
雲回碧斂幾層巔
棲梧曉望金光動
向

廣靈縣志
日晴翻翅羽遷共羨朝陽鳴盛瑞無分老叟與
童年

聖泉松風

齊管

山藏古寺在巖阿幾樹藤枝掛薜蘿雪浪飛空
畫閣聳泉流分道紫瀾多風過松稍聲遠吼雨
敲殿角夾鳴珂試問浮圖何日有功垂千載不
能磨

聖泉松風

庠生齊相邑人

炯炯法燈垂峻阿菩提甘露在雲蘿波搖石動
激洄急泉發溪連珠藻多山徑幾層騰茂草松
風一路雜璫珂迷離烟景人間少鼓盪神機自
不磨

白羊暮靄

齊相

白羊西望萬峯頭幾度呼童縱遠遊韶令春暉
光已去夕陽晚照景多悠斷雲半落千岩翠孤
鴈驚飛一葉秋仙跡何年曾至止登臨絕頂却
忘愁

千福曉鐘

庠生董榮邑人

春融千福水霜消半在巒頭半在腰天籟曉聞
方外刹鯨聲喚醒夢中蕉五燈花燦城邊爛一
偈宏開覺路遙莫向嵩陽聞妙諦白雲深處道
心寥

斗山積雪

董 榮

斗宿群峯指顧間經年積雪隱蒼顏天邊玉筍
參差出地湧瑤花次第攀鶴筆登來迷岐路玉
門回望失前灣襄陽縱有尋梅興不識梅開第

幾山

卷十終